

Tres obra literario...tres genero diferente y un solo autor: Jossy Tromp

ORANJESTAD - Ex Rector di Colegio Arubano, sr. Jossy Tromp a realisa e presentacion oficial di tres buki di dje, esta: "Na Caminda"; "Camind'i Cruz"; "Tera di Waltaca" na Biblioteca Nacional Aruba su sede na Oranjestad.

E linguista y organisado di e evento aki, sr. Mirto Lacle a considera e hecho aki como "algo casi historico", ya cu riba e mesun anochi un autor ta haci e lansamento pareu di tres buki na Papiamentu cu lo enrikece nos idioma mas. "Pa prome biaha un autor ta publica tres obra literario na Papiamentu na mesun momento", el a bisa. E tres obranan aki ta di diferente genero literario: prosa, poesia y obra di teatro, caminda e autor ta demostra su versatilidad den expresion literario. E tabata un anochi ameno, cu a conta cu un presencia grandi di publico entre nan Parlamentario sra. Eveline Wever-Croes y director di departamento di Cultura, drs. Siegfried Dumfries.

Un anochi cultural



E anochi cultural ey, e autor kende a debuta den e mundo literario na 1990 cu su buki Cetilalma y otro cuentanan Arubiano, a papia riba su obranan specialmente riba su cuenta di ficcion "Tera di Waltaca". Esaki a wordo realisa pa medio di un entrevista cu el a tene cu sr. Elton Lioe A Tjam, dilanti e publiconan presente. Den su obra poetico sr. Tromp a wordo inspira riba diferente parti di Aruba, specialmente Boca Catalina, un sitio unda e autor ta wordo inspira pa traha su poesianan. Sr. Lacle a declara cu e

introduccion di e buki aki a tuma luga despues cu 21 di april ultimo a wordo celebra Dia Internacional di Poesia, y 27 di maart caminda mundo a celebra Dia Internacional di Teatro.

Como parti di e programa, e publico a wordo deleita cu un potpourri musical di sr. Eddy Toppenberg cu a cay na



masha agrado, y cu a duna un toque special na e evento aki. Igualmente durante e mesun evento aki, e musico Pedro "Chencho" Kelly a bin cu un repertorio musical hunto cu su grupo "Zjilea" cu a deleita publico cu nan musica. E musico a celebra 40 aña di bida artistico y pa tal motibo a organisa un bunita exposi-

cion "Un Bida Dedicada na Musica" den e sala chikito di BNA. E expo aki a keda habri oficialmente riba e mesun anochi aki.

E actividad aki tabata posibel danki na Biblioteca Nacional Aruba, Instituto Pedagogico Arubano y Departamento di Cultura Aruba. □

